

DIOS PAPIANDO KU BO

Lès 2

Hopi hende ta pensa ku si nan aseptá Kristo komo Salvador, esei ta nifiká ku nan ta kambia di religion. Ma di bèrdad, ora bo aseptá Kristo, bo ta aseptá un Persona, bo ta establese un relashon personal ku Kristo Hesus. Por bisa ku na e momentu ei bo ta sera konosí ku n'E.

Awor lo bo deseá pa desaroyá bo relashon personal ku Esun ku ta stimábo asina tantu ku El a muri pa bo. Ma sin kontakto diario ku n'E, lo bo nunca por konosé Dios íntimamente i nunca lo bo por hiba un bida spiritual satisfaktorio. P'esei ta importante pa establese un tempu privá pa komunion ku Dios.

KON PA DESAROYA BO RELASHON PERSONAL KU DIOS

Si bo ke siña konosé un persona, dos kos mester sosodé: bo mester komuniká kun'é i e mester komuniká ku bo. Di e mésun manera bo ta siña konosé Dios.

Kon Dios ta papia ku bo? 1 Tesalonisensenan 2:13 ta bisa entre otro, “...ora boso a risibí for di nos e _____
Su mensahe, boso a asept'é no komo _____,
ma pa loke e ta bèrdaderamente, e _____
ku ta obra tambe den boso ku ta kere.” Beibel ta Dios Su manera di papia ku hende.

Kon bo ta papia ku Dios? Dor di orashon. Mateo 6:6 ta bisa, “Ma abo, ora bo ta hasi orashon, bai den bo kamber di mas paden, i ora bo a sera bo porta, _____na bo Tata ku ta den skondí; i bo Tata ku ta mira den skondí, lo rekompensábo.”

Maske tur dos ingrediente ta esensial pa desaroyá bo relashon personal pa ku Dios, e lès aki lo konsentrá riba esun promé so. E siguiente lès lo trata spesífikamente ku orashon.

E IMPORTANSIA DI INVERTÍ TEMPU DEN BEIBEL

Ora bo ta kumpra un outo nobo, e ta bin ku manual di e fabrikante ku ta indiká kiko bo mester hasi pa e outo funshoná optimal. Dios a krea hende. Nos Kreador a stima nos asina tantu ku El a duna nos Su Manual, Beibel, pa nos por sa kon pa funshoná optimal. P’esei ta bal e la pena pa siña konosé Palabra di Dios bon i hasi loke E ta bisa. Si bo ignorá e instrukshon den manual di bo outo, lo bo yora lat ta malai. Di igual manera, bo por ignorá e instrukshon den Manual di bo Kreador, ma tempu lo yega ku bo lo sufri e konsekuensianan. Mihó lesa e Manual bon i hasi loke e ta bisa! Lo bo evitá hopi doló di kabes pa bo mes!

Ku tempu lo bo ripará mas benefisio di komunion diario ku Dios den Beibel. Segun e tekstonan aki, kiko ta algun benefisio ku Skritura ta produsí?

1. Salmo 1:1-3 – Dios ta bisa di esun ku tin delisia den Beibel i ta meditá den dje, *“tur loke ku e hasi ta _____”*. Eksito spiritual i den bida ta muchu mas importante ku rikesa.
2. Salmo 119:9 - *“Kon un hóben por tene su kaminda _____? Dor di mantené esei segun _____.”* Beibel lo kitábo di piká, òf piká lo kitábo di Beibel!
3. 1 Pedro 2:2 – *“meskos ku yunan resien nasí, anhelá na e lechi puru di e _____, asina ku pa medio di djé boso por _____ den salbashon.”*
Vários bes pa dia bo ta kome pa mantené bo salú. Di igual manera, bo tin mester di alimentashon spiritual diario for di Beibel. Bo ta perhudiká bo salú spiritual si bo no ta dediká tempu pa alimentá bo ser spiritual ku Palabra di Dios tur dia. Job asta a preferá Skritura riba kuminda (Job 23:12). Pa Jeremias, Palabra di Dios tabata sabroso (Jeremias 15:16). E tabata e delisia di e Salmista (Salmo 119:47,97,127,167). Stima i desfrutá di Palabra di Dios.

SINKU DEDE DI MAN

Debí ku Beibel ta Palabra di Dios, ta hopi importante pa konos'é bon i kòrda loke e ta bisa. Kon bo por hasi esei? Manera e sinku dede di man ku ta tene algu bon duru, tin sinku manera pa bo haña un bon grap riba Palabra di Dios. Kiko nan ta?

1. Lukas 11:28 *“Bendishoná ta esnan ku ta _____ e palabra di Dios...”*
2. Revelashon 1:3 *“Bendishoná ta esun ku _____ i esnan ku tende e palabranan di e profesia...”*
3. Echunan 17:11 *“Awor esakinan tabata hende di mentalidat mas nobel ku esnan na Tesalónika, pasobra nan a risibí e palabra ku bon boluntat i tabata _____ e Skrituranan tur dia, pa mira si e kosnan aki tabata asina”*
4. Salmo 119:11 *“Bo palabra mi a _____ pa mi no peka kontra Bo.”*

Despues di 24 ora, bo por kòrda na un forma presiso

- 5% di loke bo a tende,
- 15% di loke bo a lesa,
- 35% di loke bo a studia,

Ma bo por kòrda 100% di loke bo a memorisá.

5. Josué 1:8 *“E buki di lei aki lo no apartá for di bo boka, ma bo mester _____ den dje di dia i anochi, pa bo pèrkurá di hasi konforme tur loke ta pará skirbí den dje; pasobra e ora ei lo bo hasi bo kaminda prosperá, i e ora ei lo bo tin éksisto.”*

Dios ta primintí ekstito pa esun ku ta medita den Skritura. E palabra “meditá” tin e idea di “herkauw”. Un kabritu ta kou kuminda, guli'é, i despues ta bolbe kou é. Ora bo ta meditá den Dios Su Palabra, bo ta hasi algu similar:

- a. Bo ta tende, lesa, studia, òf memorisá un teksto
- b. Bo ta sigui pensa kiko e teksto ta nifiká
- c. Bo ta pensa kon bo por aplik' é na bo bida i hasié.

TEPNAN PRAKTIKO

1. Lesa Palabra di Dios na un forma sistematiko kada dia—no salta aki ayá. Pa kuminsá, ta rekomendabel pa lesa e buki di Juan. Lesa ún kapítulo kada dia.
2. Lesa Beibel ku un proposito. Ora un hóben ta risibí un karta di amor, e ta apresíá e karta pasobra dor di e karta e tin kontakto ku esun ku e ta stima. Beibel ta Dios Su karta di amor pa bo. P'esei bo proposito pa lesa Beibel mester ta pa bo konosé Dios mihó i tin komunion ku n'E i pa bo agrad'E.
3. Pensa loke bo a lesa...meditá. Bolbe les' é. Ta mihó pa lesa poko i komprend' é bon, ku lesa hopi i no sa kiko bo a lesa.
4. Pensa kon bo por apliká loke bo a lesa. No ta basta pa lesa Beibel; mester obedesé tambe bisa. Talbes den e teksto ku bo a lesa, Dios a muestra algu bo tin ku kambia den bo bida.
5. Nota den un skref loke bo a siña e dia ei.
6. Hasi orashon pa Dios yudábo hasi loke bo a siña.
7. Konta un hende loke bo a siña for di Palabra di Dios awe. E echu ku bo ta kompartí loke bo a siña ku un otro persona lo yudábo kòrd' é i hasié.

TAREA PA KAS

1. Kuminsá kada dia ku 15 minüt pa Dios...algun minüt pa lesa un kapítulo di Juan kada dia i algun minüt pa orashon diario
2. Siña 1 Pedro 2:2 for di kabes.
3. Promé ku e siguiente lès, konta un otro persona ku bo a aseptá Kristo komo bo Salvador personal.
4. Lesa e siguiente lès i yena e kontestanan.